



Republika e Kosovës – Republika Kosova  
Paneli Zgjedhor për Ankesa dhe Parashtrësia  
Izborni Panel za Žalbe i Predstavke

Anr.127/2019

**Paneli Zgjedhor për Ankesa dhe Parashtrësia (PZAP)**, në panelin e përbërë nga gjyqtarët: Adnan Konushevcu kryesues, Afjete Sada - Gillogjani dhe Faton Ademi anëtarë, me pjesëmarrjen e zyrtarës së lartë ligjore, Antigona Murati, duke vendosur përkitazi me ankesën e subjektit politik, Lëvizjes Vetëvendosje, paraqitur kundër koalicionit NISMA/AKR/PD, me seli në Prishtinë, për shkak të shpërndarjes së materialit ushqimor, për Zgjedhjet e Parakohshme për Kuvendin e Republikës së Kosovës, që do të mbahen me datë 29.10.2019, në seancën e panelit të mbajtur me datë 02.10.2019, mori këtë:

### VE N D I M

**Refuzohet** e pabazuar ankesa Anr. 127/2019 e datës 29.09.2019, e paraqitur nga subjekti politik Lëvizja Vetëvendosje, me seli në Prishtinë, kundër koalicionit NISMA/AKR/PD, me seli në Prishtinë.

### A r s y e t i m

Me datën 29.09.2019, PZAP-i ka pranuar një ankesë nga subjekti politik, Lëvizja Vetëvendosje, me të cilën pretendon se me datën 28.09.2019, rreth orës 15:30, kanë vërejtur blerje të votës nga aktivistët e koalicionit NISMA/AKR/PD, në kundërshtim me legjislacionin zgjedhor, duke konsumuar vepër penale sipas nenit 210 dhe 212 të Kodit Penal të Kosovës.

Paraqitësi i ankesës pretendon se koalicioni NISMA-AKR-PD, kanë cenuar përcaktimin e lirë të votuesve i cili veprim është në kundërshtim në nenin 33 par.6 pika b), të LZP-së. Këto pretendime janë të materializuara me prova materiale videot edhe në fotografitë të cilat janë bashkangjitur ankesës. Në ankesë pohon se nga provat e parashtruara shihet qartë se si aktivistët e koalicionit të lartë shënuar kanë dhënë gjëra ushqimore për qytetarë në lokacionin e caktuar, si dhe dy fletëvotime me qëllim që në ditën e votimit të votohet numri 122, numri i përcaktuar në fletëvotim për koalicionin NISMA-AKR-PD, si dhe deputetet me numër 10,16,32,36, dhe 74. Sipas paraqitësit të ankesës veprimi i tillë i subjektit politik NISMA-AKR-PD, është i sanksionuar me legjislacionin në fuqi dhe Kodit penal të Kosovës. Kërkojmë nga PZAP që koalicioni subjekti politik NISMA-AKR-PD, të sanksionohet me legjislacionin zgjedhor në fuqi. Ankesës si provë materiale i është bashkangjitur një CD dhe fotografit .

Koalicioni NISMA/AKR/PD, në përgjigjen në ankesë e kundërshtojnë në tërësi ankesën e paraqitur nga subjekti politik Lëvizja Vetëvendosje si të pa bazë, të pa argumentuar me fakte dhe tendencioze. Në vazhdim të përgjigjes theksojnë se nga provat materiale të parashtruara nga ankuesi nuk mundë të vërtetohet se aktivistët e koalicionit NISMA-AKR-PD, kanë

shpërndarë gjëra ushqimore për qytetarë në lokacionin e caktuar, me qëllim që në ditën e votimit të votohet numri 122, numri i përcaktuar në fletëvotim për koalicionin NISMA-AKR-PD. Po ashtu pohojnë se në portalin “sinjali” por edhe “koha” kandidati për deputet i LVV-së Valdrin Ahmeti, me numër të kandidatit 59, ka qenë nga të parët i cili në rrjetin social Facebook e kishte bërë postimin e këtij inqizimi akuzues me qëllim që ti kundërvihet subjektit të tyre politik. Për më tepër koalicioni NISMA-AKR-PD, shprehin indinjatën e tyre për këtë veprim denigrues që po ju bëhet subjektit të tyre në kohë të fushatës zgjedhore, përkundër faktit se, subjekti i tyre politik po zhvillon fushatën në përputhje të plotë me Ligjin për Zgjedhjet e Përgjithshme(LZP), dhe Rregullën zgjedhore Nr.11-2013.

Koalicioni NISMA/AKR/PD kërkon nga PZAP, që të marrë në konsideratë përgjigjen e subjektit të tyre dhe të hedh poshtë ankesën.

Përgjigjes i është bashkangjitur linqet e portaleve mbi postimin fillestar dhe autorin e postimit si në vijim, linkun “sinjali.com, “koha” si dhe deklaratat e kandidatëve të apostrofuara në këtë ankesë dhe video inqizim.

PZAP-i, lidhur me këtë rast i është drejtuar Policisë së Kosovës me qëllim që të hetohet rasti. Në Raportin policor të datës 01.10.2019 NJEHP-Prishtinë, theksohet se pas hetimeve të bëra lidhur me këtë rast është identifikuar se lokacioni gjendet në rrugën Imzot Nikprela, lagjia Ulpian D-9 Hy-5 Prishtinë, ku gjendet lokali të cilin e shfrytëzon shoqata “Nëna dhe Fëmijët e Lumtur”. Po ashtu në raportin policor theksohet se me datën 01.10.2019, është intervistuar Rina Shala aktiviste-vullnetare në këtë shoqatë, e cila ka deklaruar se kjo është një shoqatë bamirëse që ju ndihmon familjeve në nevojë dhe donatorët janë të ndryshëm, si dhe e njejta e ka konfirmuar se kjo Shoqatë ka bërë shpërndarje të ndihmave-pako ushqimore, familjeve në nevojë, dhe në video inqizim shihet se pakot në video inqizim është e shoqatës së tyre. Lidhur me këtë rast në bashkëpunim me Prokurorin e shtetit janë duke ndërmarr veprime hetimore me qëllim të identifikimit të personave të implikuar në këtë rast.

PZAP-i, pasi që shqyrtoj ankesën vlerësoi se:

### **Ankesa është e pabazuar**

Paneli pas vlerësimit të ankesës dhe provave të bashkangjitura në ankesë vërtetoi se nga provat që gjinden në lëndë nuk mund të vërtetohet se koalicioni NISMA-AKR-PD, kanë bërë shkelje të nenit 33 pika b), të LZP-së, gjegjësisht se aktivistët e koalicionit në fjalë kanë shpërndarë gjëra ushqimore për qytetarë në lokacionin e caktuar, me qëllim që në ditën e votimit të votohet numri 122.

Ndërsa nga Raporti policor të NJEHP-Prishtinë, (dërguar në PZAP me imell me datë 01.01.2019), rezulton se, pas hetimeve të bëra dhe lidhur me këtë rast kanë identifikuar se lokacioni ku është bërë video incizimi gjendet në rrugën Imzot Nikprela, lagjia Ulpian D-9 Hy-5 Prishtinë, në të cilin lokacion gjendet lokali të cilin e shfrytëzon Shoqata “Nëna dhe Fëmijët e Lumtur”. Po ashtu në Raportin policor theksohet se me datën 01.10.2019, është intervistuar Rina Shala aktiviste-vullnetare në këtë Shoqatë, e cila ka deklaruar se kjo është

një shoqatë bamirëse që ju ndihmon familjeve në nevojë dhe donatorët janë të ndryshëm. E njëjta e ka konfirmuar se kjo Shoqatë ka bërë shpërndarje të ndihmave-pako ushqimore familjeve në nevojë dhe nga video inqizim shihet se këto janë pako të shpërndara nga shoqata e tyre.

Paneli pas i shqyrtoj dhe e hetoj të gjitha dëshmitë relevante në kuptim të nenit 117 të LZP-së, konstatoi se ankesa e parashtruar nga subjekti politik LVV, nuk mbështetet në dëshmi të qarta dhe bindëse për tu miratuar .Kjo për faktin se, nga Raporti i policisë e as nga shkresat e lëndës nuk është arritur që të vërtetohet pretendimet e paraqitësit të ankesës.

Nga arsyet e theksuar më lartë, duke bazuar nenin 118 par.1 të LZP-së, paneli vendosi si në dispozitiv të këtij vendimi.

**Paneli Zgjedhor për Ankesa dhe Parashtrësia**  
Anr.127/2019 më datën 02.10.2019

**Kryesuesi i Panelit**  
**Adnan Konushevc**



**Këshilla Juridike:** Kundër këtij vendimi nuk lejohet ankesa konform nenit 118 par. 4 të LZP-së.